

## PABOJA ETEHUE'YO EPESO CUIÑAJJI YASIJJE EFESIOS

*Pabohua tehue canaje Jesusaja epeejji  
cuanaEpeso cuiñajjijo ba'e yasijje*

<sup>1</sup> Eya bajjani Pabo. Jesosa Quitohua eya huoojea canaje oja sohui huohuiya. Jamaya Eyacuiñajji sa poanaje. Eyaya miqianaya Epeso cuiñajjijo ba'e yasijje esohui tehueaña. E'e, miqianaya Jesosa Quito nijje jjapeequiani.

<sup>2</sup> Eyacuiñajji esejaya Chii ai poani. Jesosa Quito esejaya Emeshi Mese nei oe nei. ¡Ohuaya miqianaya quea bei nee caba'e meesahua cahua! ¡Quea boejea capo mee cahua pea'ai!

*Jesosa eyajo ba'e jayojja jama eseya ba'e mee  
caje'yo Eyacuiñajjiya*

<sup>3</sup> Eyacuiñajji ca ca oe Jesosa Quitoja Chii poani. Jesosa esejaya Emeshi Mese nei poani. Eyacuiñajji ejjabihuiiqui jama ba'a: —Eyacuiñajji, miya quea pame nee nee poani.

E'e, ohuaya Jesosa huoojea canaje esejaya mimishi cuijea'yohua. Cuanaya ohuaya eseya ba'e tiitii mee caje'yo onijje eyajo. E'e, eseya o jayojjaya jama ba'e mee caje'yo quea pame nee eyajo.

<sup>4</sup> Jiquio meshi pana jjimahuaje Eyacuiñajji jjashahuabaquinaje jama ba'a: —Ojjaña cuana Jesosa nijje jjapeequiani ecue bacua cuana po

meeje'yo. Quea pame nee poaje. Mimishi'ama pea'ai poaje.

<sup>5</sup> E'e, yahuajo nei nei eseya Eyacuiñajji quea jea nee poanijo oya jjashahuabaquianaje jama ba'a: —Oya cuana ecue bacua cuana po meeje'yo, eba'ehuana jayojja ecue Bacua Jesosa Quito nijje jjapeequianijo.

E'e, jamaya Eyacuiñajji sa poanaje yahuajo nei nei.

<sup>6</sup> Jamajjeya eseyaya oya bihuiaña jama ba'a: —Eyacuiñajji, miyaya ecuana jaahuana neineiaña.

E'e, Eyacuiñajjiya oja Bacua Jesosa quea jea nee nee acani. Eseya quea jea nee nee acanijo pea'ai Jesosa huoojea canaje mano'yohua, eseja mimishi cuijea'yojji. Jamatii, sosema' huoojea canaje.

<sup>7</sup> Jamajjeya eseya cuaqui yasijje epoquijji pojjeama. E'e, jamaya poanaje Jesosa mano'yajo; ena' ojaya cuayaquinaje eseja mimishi cuana cuijea'yojji. E'e, eseya quea jea nee nee poanijo jamaya amee canaje Eyacuiñajjiya. Quea pame nee nee oya. Pea chama' o jayojja.

<sup>8</sup> Quea pame nee nee ojaya ej-jashahuabaqui'yojji. Ojaya eba ojjaña nei nei. Jamajjeya ohuaya eseya ba'e tiitii mee caje'yo onijje eyajo.

<sup>9</sup> E'e, yahuajo nei nei esejaya ba jjima ojaya ejjashahuabaquijji. Jjeya ca ca ohuaya eseya ba meesahua cani ojaya ejjashahuabaquijji cuana Jesosa Quitojo. Jamaya ohuaya acaje'yo ba'a: Jesosa Quitohua esejaya mimishi cuana cuijea ca'yonajejo, Eyacuiñajjiya eseya ba'e tiitii mee caje'yo onijje eyajo Jesosa Quito poe o'oyajo.

<sup>10</sup> E'e, quijje Eyacuiñajjiya Jesosa Quito Emeshi Mese nei oe nei po mee caje'yo. Ojjaña meshijo, ojjaña eyajo pea'ai huoojeajji poaje'yo tii tii. Oya ojjaña quea bei po meeji poaje. Jama jjashahuabaquimeya poa Eyacuiñajji.

<sup>11</sup> E'e, yahuajo nei nei Eyacuiñajjiya eseya Jesusaja epeeji cuana babaca ca'ya poa Jesusaja epeeji epo'yojji. Cuanaya Eyacuiñajji yahuajo nei nei meshi pana jjimahuajo jjashahuabaquinaje esejo jama ba'a: —Jesusaja epeeji cuana quijje nei ecuea ejjashahuabaqui'yoyji jayojja jama poaje'yo.

Jamajjeya Eyacuiñajjiya ojaya epeeji cuana quijje ojaya ejjashahuabaquiiji jayojja jama amee caje'yo.

<sup>12</sup> Jamajjeya ecuaa, Jesosa Quitoja ebionei epeeji cuaa Eyacuiñajji bihuiaje jama ba'a: —Eyacuiñajji, miya quea pame nee nee poani, ecuana Jesusaja epeeji po mee'yonaje.

<sup>13</sup> Yahuajo Eyacuiñajji ecuanajo jjashahuabaquinaje, Jodio cuanajo. Jjeya oya miquianajo, Jodio pojjeama cuanajo jjashahuabaquiani pea'ai. E'e, eyaya miquiana huasijje Jesosa Quitoja esohui e'e nei huohuinaje Jodio pojjeama huasijje. Shajja'ajja majje miquianaya Jesosa Quitoja epeeji poanaje. Jamajjeya Eyacuiñajjiya miquianaya ojaya ebacua cuana po mee ca'yonaje. E'e, miquianaaya shajja'ajjanaje Eyacuiñajjiya ejjashahuabaqui'yoyji quea pame nee miquianajo jama ba'a: —Eyaya Jodio pojjeama cuana ba'e tiitii mee sa aña Jesosa nijje eyajo Jesusaja epeeji poanijo.

Cuanaya Eyacuiñajjiya yahuajo nei huohui ca poa jama ba'a: —Eyaya Edojjoshahua Pame huoo-jeaje'yo Jesusaja epeeji yasijje ona jaahuanaa. Oya cuana Jesosa nijje jjapee tiiti qui meesahua caje'yo —oya poa.

Jamajjeya esejaya eba jama ba'a: —E'e, Eyacuiñajjiya eseya jaahuana canijo ohuaya ojaya ejjashahuabaqui'yoyji esejo jayoyja jama acaje'yo e'e jojo nei —eseyaya baña.

<sup>14</sup> E'e, Eyacuiñajjiya yahuajo huohui ca poa jama ba'a: —Jodio pojjeama cuana ecuea epeeji poaje'yo beca cuana.

Eyacuiñajjiya jamaya huohui ca poa. Jamajjeya Jodio pojjeama cuana oja bacua cuana po mee caje'yo. Onijje ba'e tiiti mee caje'yo. Ojaya ebacua cuana po'yo majje ohuaya bihuia caje jama ba'a: —E'e Eyacuiñajji, miya quea pame nee poani e'e jojo nei.

*Pabo miminaje Eyacuiñajji nijje Epesojo ba'e cuana quea pame nee epo mee'yoyji*

<sup>15</sup> E'e, miquianaya Eyacuiñajjiya epeeji poanaje. Peaa eya miquianajo huohui canaje jama ba'a: —Beca cuana Epeso cuiñajjiyo ba'e Jesusaja, esejaya Emeshi Mese neija epeeji poanaje. Onaaya ojjaña Jesusaja epeeji cuana quea jea nee acani —eya acanaje cuaa.

<sup>16</sup> Jamajjeya ohuaya miquianaya oja bacua cuana po mee ca'yonaje shajja'ajja majje eya mimiani Eyacuiñajji nijje miquianajo: —Eyacuiñajji, imiquea epeeji cuana Epesojo ba'e minijje jjapeequi meesahuacue quea pame nee!

<sup>17</sup> E'e, eya mimiani Eyacuiñajji nijje miquianajo jama ba'a: —Eyacuiñajji, miya Emeshi Mese nei Jesosa Quitoja Chii quea pame nee. Jamajjeya imiquea epeeji cuana Epesojo ba'e quea ja'a nee jjashahuabaqui meecue! ¡Oya cuana miquea ej-jashahuabaqui'yojji, miquea esohui cuana pea'ai ba meesahuacue! Jamajjeya onajaya eba nei nei miya poaje.

<sup>18</sup> E'e Eyacuiñajji, ¡oya cuana ba meecue quea ja'a nee miquea ejjashahuabaquiiji! E'e Eyacuiñajji, miyaya oya cuana babaca'yonaje; oya cuana ba'e tiitii meeje'yo Jesosa nijje eyajo. ¡Quea pame nee nee Jesosa nijje eba'ejji, de! ¡Maya oya cuana ba meesahuacue quea ja'a nee! E'e, jamaya miquea ejjashahuabaquiiji miquea epeeji cuanajo.

<sup>19</sup> Eyacuiñajji, miya quea ca'a nee nee poani; pea chama' mi jayojja quea ca'a nee nee. ¡E'e Eyacuiñajji, miya quea ca'a nee nee poanaje Jesosa Quito jaahuanajji! ¡Miquea epeeji cuana ba meesahuacue miya quea ca'a nee nee poani ecuana jaahuanajji pea'ai! —eya jamaya mimiani Eyacuiñajji nijje miquianajo.

<sup>20</sup> E'e jojo nei Eyacuiñajji quea ca'a nee nee. Jamajjeya Jesosa Quito dejja mase cuaa quecua ca'yajje mano'yajo, Eyacuiñajjiya shequi mee ca o'oya poa. Shequi mee'yo majje eyahuasijje do-josohuaqui ca'ya poa. Jomajo Eyacuiñajjiya Jesosa Quito onijje ojjaña huoojea'yojji po mee cani.

<sup>21</sup> E'e, Jesosa oe nei quea ca'a nee nee po mee ca'yonaje. Oya ojjaña huoojea'yojji po mee ca'yonaje. Emeshi Mese oe nei po mee ca'yonaje pea'ai. E'e, Jesosa quea ca'a nee nee, quea pame

nee nee yani jjeya; quijje aje oe oya ma ani titii'yome poaje. Oya quea bajjani huiso nee, quea pame nee nee poani Jesosa.

<sup>22</sup> E'e, Eyacuiñajjiya Jesosa Quito Emeshi Mese quea ca'a nee nequi mee canaje. Ojjaña aquiana cuana Jesosaja poanaje. Ojjañaja oja epeeji cuanaja Emeshi Mese nei poanaje Jesosa. Eyacuiñajjiya huohui canaje jama ba'a: —¡Jesosa Quito shajja'ajjacue, ojjaña!

<sup>23</sup> E'e, Jesosaa ojaya epeeji cuana ojaya esohui jayojja jama ameesahua cani. Ojjaña ojaya epeeji cuana nijje nequi majje oya cuana ameesahua cani quea pame nee. E'e, ojaya epeeji cuana Jesosaja eyami jayojja jama poani.

## 2

### *Eyacuiñajjiya eseya eyajo ba'e tiiti mee caje'yo*

<sup>1</sup> Yahuaajo miquianaya quea mimishi nee nee poa jjejojo Eyacuiñajji nijje jjapeequi jjima poa.

<sup>2</sup> E'e, yahuaajo miquianaya pea cuana quea mimishi jayojja jama Edosiquiana nijje jjapeequinaje, eshahua cuanaja mese nijje. Ohuaya shajjama' cuana quea mimishi po meesahua cani.

<sup>3</sup> E'e ecuana, Jodio cuana miquiana jayojjaya poa. Eyacuiñajjijo jjashajja'ajjaqui ajja pea'ai poa. Shajjama' jayojja jama po sa poanaje eshahuaja epeeji jayojjaya. E'e de, ecuanajaya ejjashahuabaquiji quea mimishi jayojja jama po sa poanaje. Jamajjeya yahuaajo pishana ecuana, Jodio cuana, miquianaya Jodio pojjeama cuana pea'ai eshahuaja epeeji quea mimishi poanijo Eyacuiñajjiya huohui canaje jama ba'a:

—Miquianaya aje oe quea nee nee po meeje'yo eyaya, eshahuaja epeeji quea mimishi nee neejojo —Eyacuiñajji poa.

<sup>4</sup> Jamatii Eyacuiñajji eseja mimishijo jjashahuabaqui tiitii sa po ajja eseya ojaya quea jea nee nee poanijo.

<sup>5</sup> E'e, yahuajo pishana eseya Eyacuiñajji nijje jjapeequi jjima poa quea mimishi po sa neinei poanijo. Jamatii Eyacuiñajjiya eseya oja bacua quea pame cuana po mee canaje Jesusaja epeeji poanijo. E'e de, jamaya Eyacuiñajjiya eseya quea jea nee acanijo esejaya mimishi cuana cuijea ca'yonaje.

<sup>6</sup> Jamajjeya Jesosa Quitohua eseja mimishi cuana cuijea ca'yonajejo, Eyacuiñajjiya ecuana, miquianaya pea'ai ojaya bacua cuana po mee ca'yonaje ojee eyajo eba'e tiitii mee'yojji. Jamajjeya Eyacuiñajjiya ecuanaya, miquianaya pea'ai ba'e tiitii mee cani Jesosa Quito nijje eyajo. Jamaya ohuaya huohui ca poa ba'a: —Jesusaja epeeji poanijo eyaya miquianaya o jayojjaya nequi tiitii meeaña quea ca'a nee, quea pame nee pea'ai.

<sup>7</sup> E'e, Eyacuiñajjiya esejaya mimishi cuijea'yo majje ese nijje quea bei poani. Jamajjeya ojjaña cuana esohuicuayajji ba mee cani; quijje pea'ai ba mee caje jama ba'a: —E'e nei eseya Jesosa Quitoja epeeji poanijo, Eyacuiñajji ese nijje quea bei poani. E'e, Eyacuiñajji ese nijje quea pame nee nee poani tii.

<sup>8</sup> E'e de, eseya Eyacuiñajjiya quea jea nee nee. Jamajjeya miquianaaya huohuiaña jama ba'a: —Ecuea eba Eyacuiñajjiya ecuea mimishi cuana

cuijea ca'yonaje eya onijje jjapeequi jeahuajo — jamaya poanijo Eyacuiñajjiya miquiyanaya quea pame nee acani. E'e, ohuaya miquiyanajaya mimishi cuijea ca'yonaje onijje mimiyajo.

¿A'a miquiyanaya quea pame nee nee poani sosejje mimishi cuijea ca'yonaje? Chojja de, ohuaya mimishi cuana cuijea ca'yonaje sosema'.

<sup>9</sup> E'e, ohuaya esejaya mimishi cuijea ca'yonaje sosema'. Jamajjeya pea cuana siajje epojji pojjeama jama ba'a: —Eya quea pame nee poani sosejje Eyacuiñajjiya ecuea mimishi cuijea ca'yonaje — chojja, jamaya poani siajjeepojji cuana.

<sup>10</sup> E'e, esejaya eba Eyacuiñajjiya eseya pea jjashahuabaquime po mee ca'yonaje. Jamaya ohuaya aca'yonaje Jesusaja epeeji cuana poanijo. E'e, ohuaya jamaya aca'yonaje. Eseyá ojava ejjashahuabaquijji jayojja jama atiitii mee ca'yani pea'ai. Ojava ejjashahuabaquijji esejo jama ba'a: —¡Eya miquiyanajaya quea jea neejo pea cuana quea pame nee atiitiicue!

### *Eyacuiñajjiya Jodio pojjeama sa cani ojaya epeeji epojji*

<sup>11</sup> Miquiyanaya Epesojo ba'e Jodio cuana pojjeama. ¡Jamajjeya jjashahuabaquicue! Miquiyanajaya chii cuana Jodo pojjeama poa. Jamajjeya Jodio cuana miquiyanajo maimai aninaje jama ba'a: —Oya cuana ca ca oma Jodio pojjeama; Eyacuiñajjiya epeeji pojjeama.

E'e, Jodio cuana quea quehua jjashahuabaquinaje jama ba'a: Cuiishasha biso nei jehusejjajeañajo ecuana Eyacuiñajjiya epeeji



quea pame nee poani poso ecuaa anaje, Jodio cuaa.

<sup>12</sup> Jamajjeya yahuajo Jesosa Eyacuiñajjija huoojea'yo ojjaña jaahuanajji miquianajaya ba jjima poa Jodio pojjeamaja jjejojo. Miquianaya Eyacuiñajji ba po jjima jjejojo Eyacuiñajji ba epo cuana nijje jjapeequi ajja poa. E'e, miquianajaya Eyacuiñajji bihuia jjima Jodio cuana nijje. Yahuajo Eyacuiñajjiya huohui ca poa Jodio cuana jama ba'a: —Eyaya huoojeaje ojjaña jaahuanajji miquiana huasijje —poanaje.

Maya miquianajaya ba jjima poa Jodio pojjeamaja jjejojo. Jamajjeya miquianaya jjashahuabaquinaje jama ba'a: —E'e de, ecuaana jaahuanajji quea pame nee chama'. ¿Aya acuae ecuaana jaahuana caje'yo? —poanaje.

E'e de, miquianajaya Eyacuiñajji ba jjima poanaje. Jamajjeya ¿aya miquianaya jaahuana canaje? Quea camaja eba'ejji mee nei jiquio meshijo.

<sup>13</sup> Jjeya ca ca miquianaya Eyacuiñajjija epeeji cuana poani Jesosa Quito nijje jjapeequianijo. E'e, yahuajo miquianaya Eyacuiñajji bihuia po jjima poanaje. Jjeya ca ca Eyacuiñajjiya miquiana Jodio cuana jayojja jama amee canaje. E'e, jjeya miquianaya Eyacuiñajji bihuiajji. Jesosa Quito miquianajaya mimishi cuijea'yojji mano'yonaje, ojaya ena' cuayaqui'yonaje. Jamajjeya Eyacuiñajjiya miquianaya oja bacua cuana po mee ca'yonaje.

*Jodio cuana nijje Jodio pojjeama cuana ojee  
jjapeequije Eyacuiñajji nijje*

14 E'e, Jesosa Quitohua ecuana ojaya epeejji po mee canajejo, beca Jodio cuaa Jodio pojjeamajo huohui cani jama ba'a: —E'e de, Jodio pojjeama cuaa Eyacuiñajji bihuia cani ecuaa jayojjaya Jesosaja epeejji poaniya jjejojo —poani.

E'e, Jodio cuana Jodio pojjeama cuana nijje Jesusaja epeejji poani jjejojo huapa pojjeama poani. Jjeya Jesusaja epeejji poani jjejojo Jodio cuanaja ejjashahuabaquijji jayojja jama Jodio pojjeama cuana jjashahuabaquiani. Epeejji nei nei poanaje. E'e de, jamaya poanaje Jesosa Quito ojjañaja mimishi cuijea'yojji acui ecueata'apeejo mano'yonajejo.

15 Ojjañaja mimishi cuijea'yojji poani jjejojo Jesosa ojaya epeejji cuana nijje miminaje jama ba'a: —¡Jodio etiiquianaja esohui jayojja jama a'a aji ca ecuea epeejji epojji! Chojja, enijje jjapeequianijo Jodio cuana, Jodio pojjeama cuana pea'ai ecuea epeejji cuana poanaje. Ojjaña cuana huapa pojjeama cuana poanaje. Jamajjeya Jodio cuana Jodio pojjeama cuana nijje ojee jjapeequi meeje'yo quea bei —acanaje Jesosa Quitohua.

16 Jesusaa Jodio cuana, Jodio pojjeama cuana pea'ai ojaya epeejji cuana po mee ca'yonaje; oya cuana Eyacuiñajjija epeejji cuana poanaje. E'e, oya cuana Eyacuiñajjija bacua cuana poanijo, ojee nequi mee caje huapa pojjeama jayojja jama, quea bei. Jamaya amee canaje Jesusaa acui ecueata'apeejo mano'yo majje.

17 Cuanaya Jesosa Quito poeyanaje miquiana que, ma Jodio pojjeama huasijje jama huohuiya ba'a: —E'e de, jjeya miquianaya Eyacuiñajjija epeejji po meeña. Yahujajo miquianajaya Eyacuiñajji

ba jjima Jodio pojjeamaja jjejojo. Jjeya ca ca ojaya epeeji quea bei poani miqúanaya —Jesosa poanaje.

Jesosa ecuana huasijje, ma Jodio cuana huasijje poeyanajeya Eyacuiñajji esohui bajji yasijje. Ma ecua miqúaaaya huohui canaje jayojjaya jama ecuaaya huohui canaje pea'ai.

<sup>18</sup> Jamajjeya ecuana, Jodio bajjani cuana Eyacuiñajji nijje mimiani; miqúanaya Jodio pojjeama cuana pea'ai Eyacuiñajji nijje mimije'yo, esejaya Chii ai nijje. E'e, Edojjoshahua Pame oe nei yani ojjaña Jesusaja epeeji cuana nijje. Ohuaya Jesusaja epeeji cuana Eyacuiñajji nijje mimi meesahua cani mete'ama.

<sup>19</sup> Jamajjeya jjeya Eyacuiñajjiya Jodio pojjeama cuana jama acani ba'a: —Yahuajo miqúanaya ecuea epeeji pojjeamajo eyaya miqúanaya jaahuana jjima poa. Jjeya ca ca miqúanaya ecuea epeeji poani. Ecuea huapa pojjeama poani ecuea pea epeeji cuana nijjeya —acanjje Eyacuiñajjiya.

<sup>20</sup> E'e, Jesusaja huoojea'yo cuanaja esohui shajja'ajjanaje miqúanaaya. Cuanaya yahuajo nei Jodio esohui huohuiji cuaa esohui e'e nei huohui canaje. Maya jjeya miqúanaaya shajja'ajjanaje. Jamajjeya miqúanaya Jesusaja epeeji poanaje pea'ai. Jamaya po mee canaje Jesusaa ba'a: Ojaya epeeji cuana equi jayojja jama nequi. Jesosa Quito ca ca quea ca'a nee, quea pame nee nee poani, equi yamajjana quea ca'a jayojja oya. E'e, jiquio ecua eyamajjanajo acui ejeasehuijaajji huana majje acui equecuajeajji huisajo bequiobo ba'ehuana cani jayojja jama Jesusaa ojaya esohui huohuiji cuana quea pame nequi

mee cani. Majoya esohui huohuijjiya ojjaña Jesusaja epeeji cuana quea pame ba'e meesahua cani. Jesusaja huoojea'yo esohui huohuijji cuana, Jodioja esohui huohuijji cuana pea'ai ma acui eba'ehuanasohuajji jayojja jama poani.

<sup>21</sup> Jjeya miquianaya Jesusaja epeeji po majje acui ejeasehuijji jaajji biajje nequi jayojja jama poani. Jamajjeya jiquio ecua equi yamajjana quea ca'a nequijo equi quea ca'a nequia mee cani jayojja jama Jesusaa quea ca'a poaniya ojaya epeeji cuana ojee quea ca'a onijje jjapeequi mee cani. Equi quea ca'a jayojja po mee cani.

<sup>22</sup> E'e, jjeya miquianaya, Jodio pojjeama Jesosa Quitoja epeeji poanijo Edojjoshahua Pame ojjañaajo nequi. Jamajjeya ojaya epeeji Jodio bajjani cuana nijje ojee nequi, equi quea ca'a jayojja poani.

### 3

#### *Pabohua esohui huohui majamaja canaje Jodio pojjeama cuanaja ebajji*

<sup>1</sup> Eya Pabo, Jesosa Quitoja esohui huohuijji. Eyaya ojaya esohui huohuinaje miquiana huasijje, Jodio pojjeama bajjani yasijje ojaya epeeji nei epo meeji. Jesusaja esohui huohuiañaajo pea cuaa eya iña majje jeanobiajea ca'yonaje eya esohui ehuhui poaje jjejojo.

<sup>2</sup> Jamatii. Pea cuaa miquiana huasijje huohuiqui canaje ejo jama ba'a: —Eyacuiñaajjiya Pabo huoojea canaje ojaya esohui Jesusajo huohuiya Jodio pojjeama cuana huasijje —acanaje.

<sup>3</sup> Yahuajo miquianajaya ba jjima Eyacuiñajjiya ejjashahuabaquijji jama ba'a: —Jesosa Quitohua ojjaña ojaya epeeji cuana, Jodio cuana, Jodio pojjeama cuana pea'ai ba'e tiitii mee caje'yo onijje eyajo.

Maya Eyacuiñajjiya eya ojaya epeejiyojo ba mee canaje. Jamaya ecuea esohui etehue'yo miquiana huasijje yahuajo huohuia poa.

<sup>4</sup> E'e, maya miquianaaya banaje. Jamajjeya jama jjashahuabaquime poanaje ba'a: —E'e jojo nei Eyacuiñajjiya Pabo ba mee canaje ojaya ejjashahuabaquijji jama ba'a: Jesosa Quitohua ojjaña ojaya epeeji cuana, Jodio cuana, Jodio pojjeama cuana pea'ai ba'e tiitii mee caje'yo onijje eyajo —jamaya miquianajaya eba poanaje.

<sup>5</sup> Yahuajo nei ca ca Eyacuiñajjiya pea cuana huasijje huohui jjima ojaya ejjashahuabaquijji Jesosa Quitojo, ma Jodio pojjeama cuana ojaya epeeji po mee majje o jaahuanajji poaje'yo pea'ai. Jjeya ca ca Eyacuiñajjiya Edojjoshahua Pame huoojea canaje ojaya epeeji cuana huasijje. Ojaya epeeji beca cuana huoojea canaje ojaya ejjashahuabaquijji jayojja jama huohuiya. Edojjoshahua Pameya ma esohui huohuijji cuana ba mee canaje Eyacuiñajjiya ejjashahuabaquijji Jodio pojjeamajo pea'ai.

<sup>6</sup> Eyacuiñajji jjashahuabaquinaje Jodio pojjeama cuana jama ba'a: —Jodio pojjeama cuana ecuea epeeji po majje ecuea huapa pojjeama cuana poaje. Oya cuana ba'e tiitii meeje'yo eyajo Jesosa nijje. E'e nei, eyaya huohuinaje ecuea epeeji cuana Jodio bajjani cuana huasijje jayojja jamaya eyaya aje'yo ecuea

epeeji Jodio pojjeama cuana huasijje pea'ai. Jamaya eyaya aje, oya cuana Jesusaja epeeji poanijo. E'e, Jodio pojjeama cuaa shajja'ajja canaje ecuea esohui Jesosa Quitojo –Eyacuiñajji poanaje.

<sup>7</sup> E'e jojo nei Eyacuiñajjiya eya huoojea canaje ojaya esohui quea pame nee Jesusajo huohuiya. Eya ojaya quea jea poanajejo, ohuaya eya ojaya epeeji po mee ca'yonaje, eya ojaya esohui huohuiji po mee canaje pea'ai.

<sup>8</sup> Jamajjeya Jesusaja pea epeeji cuana quea pame nee nee; eya ca ca quea pame pishana yahuajo Jesusaja epeeji cuana cuia mee'yojji poa jjejojo. Jamatii Jesosa nijje jjapeequiyajo, Eyacuiñajjiya eya huoojea canaje ojaya esohui huohuiya. E'e de, eya ojaya esohui huohuiji poanaje, esohui quea pame nee Jesosa Quitojo ehuhuiji Jodio pojjeama cuana huasijje. Jamajjeya oya cuana ba meeje ache pame nee nee Eyacuiñajjiya ejjashahuabaquiiji onajo. E'e, jjeya oya cuana ba'e tiitii mee caje'yo eyajo Jesusaja epeeji poani jojoya.

<sup>9</sup> Eyacuiñajjiya eya huoojea canaje ojjaña ojaya ejjashahuabaquiiji ba meesahuaa, ma yahuajo ojjaña ba jjima poa. Ecuea esohui shajja'ajja majje ojjaña ba caje jama ba'a: Ojjaña Jesusaja epeeji ojee ba'e tiitii mee caje'yo eyajo onijje e'e jojo nei jjapeequianijo, Jodio cuana, Jodio pojjeama cuana pea'ai. E'e, Eyacuiñajji quea ca'a nee nee. Oja pana'yo ojjaña, de. Yahuajo nei oya jjashahuabaquia poa ojjaña jaahuanajji. Jamatii ecuanajaya etiiquiana maya ejjashahuabaquiiji ba mee jjima poa Eyacuiñajjiya.

<sup>10</sup> E'e, Eyacuiñajjiya eya huoojea canaje ojaya ejjashahuabaquijji huohuiya. Jamajoya ojjaña esohuidojojji mese cuaa, ojjaña pea cuana eyajo nequiya cahuohui cahua jama ba'a: —¡Bacue oe! Eyacuiñajji jjashahuabaquiani quea pame nee, quea ja'a nee nee. E'e, ohuaya ojjaña ojaya epeeji cuana onijje nequi tiitii mee cani eyajo —ojjanaa ca'a cahua.

<sup>11</sup> Jamaya Eyacuiñajji jjashahuabaquia poa yahuaajo nei nei, jiquio meshi pana jjimahuajo. Ojaya ejjashahuabaquijji quea ja'a nee jayojja jama poanaje Jesosa Quito, esejaya Emeshi Mese nei.

<sup>12</sup> Jamajjeya jjeya eseya mimije'yo Eyacuiñajji nijje mete'ama Jesosa Quitoja epeeji po majje.

<sup>13</sup> Jamajjeya eyaya miquianaya huohuiaña jama ba'a: —Miquiana huasijje Jesusaja esohui huohuiaña, pea cuaa eya jeanobiajea canaje eya miquiana huasijje esohui ehuhui poaje jjejojo. Jamatii ja'a quea yeno pojji! Quea camaja ejeanobia ejaajji, de. Jamatii ecuea esohuijo miquianaya Jesusaja epeeji poanaje.

### *Jesosa Quitohua eseya quea jea nee nee acani*

<sup>14</sup> Jamajjeya miquianaya, Jodio pojjeama Jesusaja huapa pojjeama poanijo, eya Eyacuiñajji nijje mimiani miquianajo. E'e, Eyacuiñajji esejaya Chii ai quea pame nee nijje eya mimiani jama ba'a: —Eyacuiñajji, miya quea pame nee nee —eya poani.

<sup>15</sup> E'e, Eyacuiñajjiya pana ca poa ojjaña. Jesusaja epeeji jjeya eyajo nequi, ojjaña ojaya epeeji jiquiojo nequi pea'ai Eyacuiñajjija bacua cuana

poani. Etiiquiana ojaya epeeji cuana pea'ai Eyacuiñajija bacua cuana poa.

<sup>16</sup> Jamajjeya eya onijje jama mimiani miquianajo ba'a: —Eyacuiñajji, miya quea pame nee yani tii tii quea ca'a nee nee. Miyaya Edojjoshahua Pame huoojeanaje miquea epeeji cuana Epesojo ba'e yasijje quea ca'a po meeya. ¡Edojjoshahua Pameya miquea epeeji cuana caba'e meesahua cahua quea ja'a nee miquea esohui jayojja jama!

<sup>17</sup> E'e Eyacuiñajji, miquea epeeji cuaa huohui cani jama ba'a: “Jesosa nijje ecuana jjapee tiiti-iquiani”. Jamajjeya ¡oya cuana Jesosa Quitoja ej-jashahuabaqui'yojji jayojja jama jjashahuabaqui meesahuacue quea ja'a nee! ¡Jamaya acue Eyacuiñajji, miya quea ca'a nee poanijo! E'e, miquea ejjashahuabaquiiji jama ba'a: “Ecuea epeeji cuana quea jea nee poani. Eyaya oya cuana quea ja'a nee ba'e meesahuaje ecuea ejjashahuabaquiiji quea ja'a nee jayojja jama”. E'e Eyacuiñajji, quea jea nee nee miquea epeeji cuana. ¡Maya miyaya oya cuana ba meesahuacue! Jamajjeya oya cuana mijo jama poani ba'a: “Eyacuiñajija ecuana quea jea nee nee poani. Ecuana jaahuana cani quea pame nee nee” oya cuana poani.

<sup>18</sup> E'e Eyacuiñajji, ¡jamajjeya miquea epeeji cuana Epesojo ba'e, ojjaña miquea pea epeeji cuana pea'ai ba meesahuacue miquea ejjashahuabaquiiji quea pame nee nee onajo poani! Jamaya miyaya ojjaña quea jea nee nee añã.

<sup>19</sup> E'e, oya cuana Jesosa Quitoja quea jea nee nee poanaje. Ojaya epeeji cuana po meesahua



ca'yonaje. ¡Jamaya oya cuana ba meesahuacue, Eyacuiñajji! Quea jea nee nee miquea ojñaña. Ecuana naya ba meemee ajja. Jamatii jjashahuabaqui meemee ajja. E'e Eyacuiñajji, ¡miquea epeeji cuana ba meesahuacue miquea ejjashahuabaquiiji quea ja'a nee onajo pea'ai! Quea huiso nee, de. Jamajjeya joya ecua miyaya huohuiaña jamaya acaje'yo cuaa quea pame nee. Onajaya ejjashahuabaquiiji miquea jayojja jama poaje'yo.

<sup>20</sup> –E'e Eyacuiñajji, ecuaaya miya bihuiaña. Miya quea ca'a nee nee oe nei poani quea pame nee nee. Jamajjeya miquea ejjashahuabaquiiji quea ja'a nee nee ecuanajo aña, miyaya. E'e, quea pame nee nee ecuaña jaahuanaña, miyaya. Quea pame nee nee miyaya aña, Eyacuiñajji. E'e, ecuaña jjapeequi meesahuaña minijje miya quea ca'a nee nee poanijo. Jamaya apoa –jamaya eya mimiani Eyacuiñajji nijje miquianajo.

<sup>21</sup> Jamajjeya ¡eseyaya ojñaña Jesusaja epeeji cuaa Eyacuiñajji ejjabihuia tiitiqui'yo! Oya quea pame nee nee.

## 4

*¡Ojee ejjachacoqui ojñaña quea bihui ba'yaniya!*

<sup>1</sup> E'e, eyaya, Pabohua Emeshi Mese neija esohui huohuiañajo, pea cuaa eya jeanobiajea canaje eya esohui ehuohui poaje jjejojo. Jamajjeya ¡ecuea esohui shajja'ajjacue! Jjeya miquianajaya eba Eyacuiñajjiija ejjashahuabaquiiji miquianajo; ohuaya miquianaya babaca canaje onijje quea ja'a nee nee ejjapeequiiji. Jamajjeya ¡jamaya ba'ecue ojaya epeeji nei!

<sup>2</sup> ¡Jesosaja epeeji cuana quea bei pocue! ¡A'a quea mase pojji pea cuana nijje! ¡A'a tecueacuajijji! Minijje quea mimishi poajo, ¡amatii oya cuana quea jea nee acue!

<sup>3</sup> E'e, Edojjoshahua Pameya Jesosaja epeeji cuana ojee jjapeequi meesahua cani quea bei. Jamajjeya ¡miquianaaya ojjaña jamaya atiitiicue pea'ai!

<sup>4</sup> ¡Bacue! Ojjaña eseya Jesosaja epeeji cuana Jesosaja eyami jayojja jama poani, oe eyami jayojja poani. ¡Bacue! Edojjoshahua Pame oe nei esejo yani, ojjaña Jesosaja epeeji cuanajo. Eyacuiñajjiya eseya babaca cajje ojaya oe nei ejjashahuabaquijji ojjañajo jjashahuabaqui mee canaje jama ba'a: — Ecuea epeeji cuana ba'e tiitii meeje'yo Jesosa nijje eyajo —poanaje.

<sup>5</sup> Eseyaya Emeshi Mese nei oe nei yani. Jesosaja esohui e'e nei nei oe nei yani, pea chama'. Onaaya eseya besa mee canaje enajo ojjañaja ebajji eseya Jesosa Quito oe nei nijje jjapeequiani.

<sup>6</sup> Oe Eyacuiñajji yani tii tii; pea chama'. Oya oe nei ojjañaja Chii ai. Oya ca ca oe ojjaña huoojeajji. Ojjaña ameesahua cani de, ojjaña nijje nequi pea'ai. Jamajjeya ¡Jesosaja epeeji cuana nijjeya oe quea bei nee jjapeequicue miquianaya!

<sup>7</sup> E'e. Jamajjeya Eyacuiñajjiya ojjaña Jesosaja epeeji cuana chaco meesahua cani onijje. Oe epeeji chaco meesahua cani iye huiso; pea chaco meesahua cani quea huiso, esohui huohuijji pojjaja'a, pea echacojjijo pojjaja'a.

<sup>8</sup> Jamajjeya Eyacuiñajjiya yahuajo nei jama tehueme aca poa Jesosajo ba'a:

“Eyahuasijje sohuaqui'yo majje ohuaya quea huiiso dejja cuana onijje jjapeequi meesahua caje'yo. Ohuaya ojaya epeeji cuana onijje chaco meesahua caje pea'ai”.

Jamaya tehue mee ca poa yahuajo nei nei Jesosa Quitojo.

<sup>9</sup> ¿Yajjajje acuae yahuajo nei tehue ca poa? Jama ba'a: “Eyahuasijje sohuaqui'yonaje”. Jama poanijo ba'a: Ebionei Jesosa eyajo ani meshi yasi-jje poeyanaje.

<sup>10</sup> Meshi yasijje poe majje eyahuasijje poqui o'oyanaje. Jomajo oya quea ca'a nee nee nequi tiitiije'yo, ojjaña huoojea'yojji epojji tii tii, Emeshi Mese nei epo'yojji.

<sup>11</sup> Jesusaa ojaya epeeji cuana onijje chaco meesahua cani jama ba'a: Beca cuana ohuaya huoojea canaje ojaya esohui huohuiya. Beca cuana huohui meesahua cani ma ohua quijje acaje'yo. Pea cuana huohui meesahua cani ojaya esohui quea ja'a nee nee. Pea cuana ca ojaya epeeji jaahuanajji po mee cani. Pea ca esohui huohuijji po meesahua cani ojaya epeeji cuana quea huiiso ojaya esohui eba meesahuajji.

<sup>12</sup> Jamaya Jesusaa ameesahua cani ojjaña ojaya echacojji quea pame nee epojji. Jamajjeya ojjaña ojaya epeeji cuana quea ja'a nee nee eba'e poquijji.

<sup>13</sup> Jamajjeya eseya Eyacuiñajjija Bacua Jesusaja epeeji cuana ojee jjapeequije ojaya esohui jayojja jama. Ojjaña eseyaya oya ba neineije'yo pea'ai. Jamaya eseya ojaya epeeji cuana quea ja'a nee poaje. O jayojja jjashahuabaquime poaje, epeeji etii jayojja poaje.

14 Jjeya nei jjapeequiani jayojja jama pojjeama eseya poaje. E'e, jiquio ecua beniya enashajo dojo cani pea mijijje jayojja jama esohui huohuijji nisho cuaa joya jjeya nei Jesosa nijje jjapeequiani dasia majje poquiquehua mee cani. Oya cuana jjashahuaba majamajaquiani ese dasiajji.

15 Eseyaya ca ca pea cuana quea jea poanijo esohui e'e jojo nei huohuiaña Jesosa, esejaya Emeshi Mese nei jayojja jjashahuabaquime epojji.

16 ¡Bacue! Dejjaja eyami: eme', equise, ojjaña ojaya ejjashahuabaquijji jayojja jama ojee quea pame poanijo quea ja'a nee nequi dejja. Jiquio ecua dejjaja eyami jayojja jama Jesusaja epeeji cuaa ojee chaco cani quea pame nee, Jesusaja ejjashahuabaquijji jama. E'e, ohuaya ojjaña ojaya epeeji huoojeajji poaniya ojee chaco mee cani onijje. ¡Jamajjeya ojjaña quea jea nee acue cuana! ¡Onaya jjapeequi meesahuacue!

### *Pea ba'e'yome epojji Jesosa Quito nijje*

17 Eya, Pabo Jesusaa huoojea ca'yonaje miquiana huasijje esohui huohuiya. Jamajjeya ¡ecuea esohui shajja'ajjacue! ¡Jesusaja epeeji pojjeama cuana quea mimishi jama a'a pojji! Ojaya ejjashahuabaquijji cuana cajaa.

18 E'e, oya cuana quea mimishi jjashahuabaquiani. Pea eba'ejjijo jjabahuejjaqui ajja. Jjapeequi ajja Jesosa nijje. Shajjama' de, mimishi quea boti nee ojaya.

19 Mimishi cuanaajo bicho'ama. Quea tai nee nee atiitii cani. Quea mimishi tii tii po sa neinei poani, de.

20 Miquianaaya ca ca Jesusaja esohui shajja'ajjanaje. Jamajjeya ¡ba'ecue quea pame nee!

21 ¿A'a miquianaaya Jesusaja esohui shajja'ajjanaje? E'e. ¿A'a jjabahuejjaquinaje? E'e. Ojaya esohui ca ca oe e'e jojo nei poani.

22 Jama poanaje ba'a:

—¡Ma mi ba'ya poa quea tai Jesosa Quito ba jjimahuajo pajea neinei'yocue! ¡Cajaa acue! Quea mimishi jjashahuaba tiitiqui aninajejo beshahua nei miya poquinaje cuaqui yasijje.

23 ¡Eyacuiñajjiya miquianaya quea pame nee cajjashahuabaqui mee cahua Jesusaja ejjashahuabaquiijji!

24 Eyacuiñajjiya miquianaya ba'e mee caje o jayojja. Jamaya e'e jojo nei quea pame nee eba'ejji. Jamajjeya ¡ba'ecue Eyacuiñajjiya ejjashahuabaquiijji jayojja jama!

25 Eseyá Jesosa nijje jjapeequi majje huapa pojjeama cuana poani. Jamajjeya ¡a'a onaya siajje ajji! ¡Ojjaña Jesusaja epeejji cuana nijje e'e nei mimicue!

26 ¡Miquianaya onaja mimishijo a'a quea quene po tiitijji! ¡Jjeyahua nei oe quea bei nee po o'oyacue!

27 Quea quene po tiitianijo, Edosiquiaa miquianaya dasia ca chana'. Quea mimishi, quea mimijjequijea po mee ca o'oya chana', de.

28 Jamajjeya miya siipojji ¡sii popajea'yocue! ¡Quea pame oe chaco neineicue! Jamaya eba'ejji quea pame poaje miquea quea huiso, aema' ba'e meesahuajji pea'ai.

29 ¡A'a quea mimishi mimijji pea'ai! ¡Esohui quea pame nee mimi tiitiicue pea cuana jjapeequi meesahuajji! Jamajjeya pea cuana miquea esohui shajja'ajja majje quea pame poaje.

30 Cuanaya Jesusaja epeeji quea mimishi po o'oyajo, Edojjoshahua Pame quea yeno poani. ¡A'a oya quea yeno po meeji! E'e, Eyacuiñajjiya ese quea boejea po mee'yo majje Edojjoshahua Pame huoojea canaje ese nijje nequiya. Jamajjeya Jesosa Quito poe o'oyajo Edojjoshahua Pameya huohui caje esejo jama ba'a: —Oya cuana Jesusaja epeeji nei —poaje.

31 Jamajjeya ¡a'a mimijajijji! ¡A'a quea quene pojji! ¡A'a quea tecue pojji! ¡A'a jjaniñebaquijji! ¡A'a jjamimicuiajea nobiajeaquijji pea'ai! Chojja, ¡ojjaña mimishi cuana pajea neinei'yocue!

32 ¡Pea cuana oe ba'e sahuacue quea pame nee! ¡Quea jea nee acue! Pea cuaa miya niñeba canijo, napa canijo pea'ai ¡onijje quea bei pocue! E'e, Jesosa Quito miquea mimishijo mano'yajo, Eyacuiñajjiya miquea mimishi cuana cuijea ca'yonaje, quea quene po tiiti ajja mimishijo. ¡Jamaya acue miquianaaya, ojjaña!

## 5

### *Jesosaja epeeji, ¡ojaya esohui jayojja jama acue!*

1 Eyacuiñajjiya miquianaya quea jea nee acani, oja bacua cuana. Jamajjeya ¡o jayojja jama pocue miquiana ojaya epeeji cuana poanijo!

2 Jesosa Quito ese cuanajo mano'yonaje oya quea ese jea nee poanijo. Eyacuiñajji quea bihui nee poanaje oja Bacua Ejja esejo mano'yajo.

E'e, yahuaajo nei Jodio cuaa huichacha quea shiye nee nee ba'esohuaqui mee ca poa Eyacuiñajji bi-huiajji. Ma jayojjaya Jesosa mano'yonaje esejaya mimishijo. Jamajjeya ¡pea cuana quea jea nee acue miqianaaya, Jesosa Quitohua jayojja jama acue!

<sup>3</sup> Jamajjeya miqianaya ojaya epeeji poanijo ¡Jesosa jama pocue! ¡A'a quea mimishi jashahuabaquiiji! ¡Mimishijo oe a'a mimiji pea'ai! ¡Quea mimishi a'a pojji! E'e, ¡a'a shacuima' nequi, ahuema'ani pea'ai, onajaya yahue, ehuanase pea'ai a'a siiiji! ¡A'a quea dejja tai pojji! ¡A'a quea nishehui pojji pea'ai!

<sup>4</sup> ¡Esohui quea tai a'a mimiji pea'ai! ¡Shajjama' jayojja a'a mimiji! ¡Quea mimishi, quea mimijje-guijea a'a mimiji! Jamaya quea tai. ¡Quea bihui nee ca ca Eyacuiñajji nijje mimicue!

<sup>5</sup> ¡Bacue oe! Pea cojjoji, dejja quea tai pea'ai, quea aquiana nahuejo epana'yo bihuiajji jayojja poani pea'ai eyahuasijje edobiquiiji pojjeama. Jesosa Quito nijje, Eyacuiñajji nijje pea'ai eba'ejji pojjeama eyajo, Jesosa ojjaña huoojeajji poanijo. Chama' dejja mimishija eba'ejji yajji eyajo.

<sup>6</sup> Siajjepojji cuaa miya ba'e mee ca chana' quea mimishi. ¡Oya cuana a'a shajja'ajjajji! Mimishi acanijo, shajjama' poanijo pea'ai Eyacuiñajjiya quea nee tii tii po mee caje'yo e'e jojo nei.

<sup>7</sup> Jamajjeya ¡a'a mimishi cuana nijje jjapeequiiji!

<sup>8</sup> Yahuaajo miqianaya quea mimishi ba'ya poa pea'ai. Jjeya ca ca miya Jesusaja epeeji cuana poanijo ejiojji quea ja'ajje onijje poquiani. Jama-jjeya ¡Jesusaja esohui jayojja jama quea ja'a nee acue!

9 E'e, Jesosa nijje jjapeequianijo ojjaña quea pame nee eseyaya año. Jjashahuabaquiani quea ja'a nee pea'ai. Esohui e'e nei jayojja jama ba'yani pea'ai.

10 Quea pame nee eseya año, Eyacuiñajji quea bihui nee poani. Jamajjeya ijjashahuabaquicue Eyacuiñajji quea bihui nee epo meeji!

11 Jamajjeya shajjama' cuana quea mimishi poanijo, ¡onijje a'a quea mimishi pojji! ¡Oya cuana tecueacue jama ba'a: —Jamaya quea tai. ¡A'a quea mimishi pojji! —acue!

12 Ohuaya quehuajje mimishi quea tai nee nee acani. ¡A'a mimishi cuanajo mimimimijji! ¡Cajaa acue!

13 Jesosaa shajjama' cuana jjabahuejjaqui meesahua cani; jama poani ba'a: —Coma ca quea tai; ¡a'a jamaya pojji! ¡Quea pame nee acue!

14 Jiquio ecua cuaquijijiya mecajje ojjaña jeaja'a cani jayojja jama Jesosa Quitohua shajjama' cuana mimishi pajea mee'yo majje quea ja'a ba'e meesahua cani. Jamajjeya yahuajo nei nei jama sohuicuayame poa cuana ba'a:

“Shajjama' cuana, ijjashajja'ajjaquicue! ¡Eshahua nijje popajea'yocue! Quitohua miya quea ja'a nee ba'e meesahua caje'yo”.

Jamaya aca poa yahuajo nei nei.

15 Jamajjeya ijjashahuaba neinei quicue quea ja'a nee eba'eji! ¡Shajjama' cuana jayojja jama a'a ba'eji! ¡Jesosaja esohui jayojja jama ba'ecue!

16 E'e, ijjea janobajjima nei chaco chaco tiitiicue quea ja'a nee Jesosa Quitojo! Jjea aje oe quea camaja, quea huiso cuana quea mimishi poani.



17 Jamajjeya ¡a'a shajjama' pojji! Eyacuiñajjiya miya sa caní ojaya echacojji epojji. Jamajjeya oya huohui'ajjacue jama ba'a: —Eyacuiñajji, ¿a'ya cuae eya miyaya chaco meeje so'o?

18 ¡A'a jja oe huoojji! Chojja, ishi'ishianijo miquianaya quea tai nee poaje'yo. ¡Edojjoshahua Pameja esohui miquiana nijje jama acue!

19 ¡Jamaya esohui quea pame nee Eyacuiñajji mimicue! Jama acue ba'a: —Cua'a. ¡Eyacuiñajji nijje esohuicuaya!

E'e, Edojjoshahua Pameya sohuicuaya mee caniya ¡quea bihui nee Eyacuiñajji bihuiacue sohuicuayanijo!

20 Cuanaya Jesosa Quito esejaya Emeshi Mese nei poanijo, ¡Eyacuiñajji, esejaya Chii ai bihuiacue jama ba'a: —E'e Eyacuiñajji, jamaya. Miyaya quea pame nee atititiaña —acue!

*Ehuohuijji yahue cuana huasijje, ehuanase cuana huasijje pea'ai*

21 ¡Jiquio pea esohui bacue! Jama ba'a: Jesosa Quitoja esohui shajja'ajjajji poanijo ¡ba'ecue quea bei nee miquea huapa pojjeama cuana nijje!

22 Ehuanase cuana, ¡shajja'ajjacue mo! Miquiana Jesusaja epeejji poanijo ¡miquea yahue shajja'ajjacue oe!

23 E'e, Jesosa Quito Emeshi Mese nei oe nei poanijo, ojaya esohui shajja'ajja caní ojaya epeejji cuaa. Jamaya miquea yahue mi huoojeajji poani pea'ai. ¡Oya shajja'ajjacue! Cuanaya Jesusaa ojaya epeejji cuana jaahuana caní quea pame nee. Jesusaa jayojjaya yahue cuaa ehuanase cajaahuana cahua pea'ai.

24 Jesosa Quitoja epeeji e'e jojo nei cuaa ojaya esohui jayojja jama atiitii cani. Jamaya ehuanase cuaa, ¡miquea yahue shajja'ajja tiitiicue!

25 Yahue cuana, ¡shajja'ajjacue mo pea'ai! Jesosa Quito ojaya epeeji cuana quea jea nee poanijo mano'yonaje onaja mimishi cuijea'yojji. Jamaya yahue cuaa, ¡miquea ehuanase quea jea nee acue! ¡Quea ja'a nee jaahuanacue!

26 E'e, Jesosa Quito ojaya epeeji cuana mimishi cuijea'yo majje Eyacuiñajji nijje miminaje jama ba'a: —Jiquio cuaa ecuea esohui shajja'ajja canaje. Peaa oya cuana besa mee canaje mijo pea'ai — poanaje.

27 Jamaya poanaje Jesosa, ojaya epeeji e'e jojo nei cuana quea pame nee nee epo meeji ba'a: mimishi'ama, quea tai pojjeama, quea ja'a nee nee epo meeji.

28 Jamajoya yahue cuaa, ¡miquea ehuanase ba'e meesahuacue! E'e, miya quea pame ba'e sa poanijo ¡miquea ehuanase ba'e meesahuacue quea pame! Ehuanase ba'e meesahuañajo miya quea pame ba'eje pea'ai.

29 E'e, dejja cuana quea nee nee nequi sa po ajja. Chojja. Bobi, daqui pea'ai sa'ajja cani quea pame eba'eji. Quiajjaya Jesusaa jaahuana cani ojaya epeeji cuana.

30 Jamaya oya poani eseya ojaya eyami jayojja nei nei poanijo.

31 Jamajjeya Eyacuiñajjija esohui yahuajo nei etehue'yo jama poa ba'a:

“Joya. Yahue ojaya ehuanase nijje ba'yanijo oya cuana oe nei poani, beca pojjeama. Jamaya oya cuana ba cani Eyacuiñajjiya. Jamajjeya

yahueya ojaya ehuanase oe nei cajaanahua  
cahua quea pame nee. Quea jea nee nee  
ca'a cahua; oja chii, oja enaese quea jea  
pishana ca'a cahua”.

Jamaya yahuaajo nei Eyacuiñajjiya tehue mee ca  
poa.

<sup>32</sup> Eyacuiñajjiya esohui quea pame nee nee yani  
Quitojo, ojaya epeeji cuanaajo pea'ai jama ba'a:  
Jesosa Quito ojaya epeeji cuana nijje oe nei  
jayojja poani, quea huiso pojjeama, oya jayo-  
jja jjashahuabaquime poani pea'ai. Jamaya Ey-  
acuiñajjiya oya cuana ba cani oe nei jayojja.

<sup>33</sup> Oya jayojjaya yahueya, miya quea pame nee  
ba'e sa poanijo ¡miquea ehuanase quea jea nee  
nee acue! ¡Ba'e meesahuacue quea pame nee!  
Ehuanaseya, ¡miquea yahue shajja'ajjacue oe!

## 6

*Ehuohuijji esho'i cuana huasijje echii mese  
cuana huasijje pea'ai*

<sup>1</sup> Esho'i cuana, miya Emeshi Mese neija, Je-  
sosaja epeeji poanijo ¡shajja'ajjacue mique chii,  
miquea enaese pea'ai! Jamaya quea pame. E'e,  
Eyacuiñajjiya jama aca poa ba'a:

<sup>2</sup> “¡Mique chiiya, miquea enaeseya pea'ai huohui  
cani jayojja jama acue!

<sup>3</sup> Jamajjeya eyaya miquianaya ba'e meeje quea  
bihui nee, quea pame nee. Quea huiso shequiaja  
ba'e meeje”.

Jamaya Eyacuiñajjiya huohui ca poa.

<sup>4</sup> Echii meseya, enaeseya pea'ai, ¡miquea ebacua  
cuana jaahuanacue quea pame nee! ¡A'a oni-  
jje quea tecue nee pojji! ¡A'a quea quene nee

po meeji! ¡Oya cuana huohuicue Emeshi Mese neija, Jesosaja esohui! ¡Miquea esohui shajja'ajja meecue!

*Ehuohuijji echacojji cuana huasijje echaco mee-  
jji cuana huasijje pea'ai*

<sup>5</sup> Echacojji cuana, ¡miquea echacomeejjija esohui jayojja jama pocue! ¡Chacocue quea pame nee ojaya! Jamajjeya Jesosa miquianajo quea bihui nee poaje.

<sup>6</sup> Miya chacochoani quea pame nee miquea echaco meejiya ba canijo o quea bihui po meeji. ¡Ojaya ba jjimajo a'a quea huea pojji! ¡Chacocue quea pame nee Jesosa Quitohua miya ba canijo! Jesosa miquea echacomeejji poani.

<sup>7</sup> E'e, ¡miquea echacomeejjijo chacocue quea bihui nee! Pea cuanaja yajjijo quea pame chacochoanijo Jesosa quea bihui nee po mee añã miyaya.

<sup>8</sup> E'e, ¡jiquio esohui shajja'ajjacue! Beca cuaa chaco cani ojaya echacomeejjijo. Pea cuanaja echacomeejji chama!. Quea pame nee chacochoanijo Emeshi Mese neiya, Jesosaa ojjaña sosequia caje'yo quiije eyajo.

<sup>9</sup> Echacomeejji cuaa, ¡sosequiacue miquea echacojji cuana ma ona chacochoconaje sosejje! ¡A'a quea mete po meeji! ¡A'a tecuea neineiiji! Echaco meejiya Emeshi Mese nei yani eyajo. Echacojjiya Emeshi Mese nei yani eyajo pea'ai, Jesosa bajjani. Eyacuiñajji mijo jjashahuabaquiani jayojja jama ojjaña cuanajo jjashahuabaquiani pea'ai. Quea pame nee chacoañajo, ojjaña sosequia caje'yo quiije eyajo, echacojji, echacomeejji pea'ai.

*Eyacuiñajjiya eseya quea ca'a nee po mee cani*

10 ¡Pea esohui shajja'ajjacue! ¡Jjapee neineiquicue Jesosa nijje! Jamajjeya ohuaya miquianaya ojaya epeeji quea ca'a po mee caje'yo. Oya quea ca'a nee nee poanijo miquianaya quea ca'a po mee caje'yo pea'ai.

11 Eyacuiñajji nijje mimicue pea'ai jama ba'a: — Eyacuiñajji, ¡eya miquea ejjashahuabaquijji jayojja jama ameesahuacue quea ja'a nee!

Jamajjeya ohuaya miquianaya Edosiquiana nei, Satanasa bajjani jeabichajea mee caje'yo, ohua dasia sa acanijo.

12 Pea cuaa quea mase cuaa ecuana Jesosa nijje jjapeequi pajea mee'yo sa acani. Oya cuana de-  
jja pojjeama, Edosiquiana, eshahua cuana pea'ai. Jjeya quea camaja eshahua epeeji cuanaa quea tai acanijo. E'e, eshahua cuaa huoojea cani ojaya epeeji cuana, ojjaña quea mimishi poani pea'ai ecuana dasiaa nisho, ecuana jeabichajeaa nisho pea'ai.

13 Jamajjeya ¡Eyacuiñajji nijje mimicue jama ba'a: —Eyacuiñajji, ¡eya miquea ejjashahuabaquijji cuana jayojja jama ameesahuacue! —jamaya acue!

Jamajjeya eshahuaa jeabichajea sa acanijo, miquianaya quea ca'a poaje; eshahua jeabichajeaje'yo Eyacuiñajjiya miya asahua canijo. E'e, Eyacuiñajjiya miquianaya ojaya epeeji quea ca'a po mee caje'yo.

14 ¡Quea ja'a nee jjashahuabaquicue! ¡Esohui e'e nei ba neineicue! Jiquio ecua Shomano sohuinanohua ejjacomayijji quijji yii cani ejjaquecuaquijji jama jayojja ¡esohui e'e nei ba neineicue quea ja'a nee epojji! Cuanaya sohuinanohua baa

daqui quea moo ese'ojje huosho cani onaa eque-  
cua'yo poani jjejojo jama jayojja ¡quea ja'a nee,  
mimishi'ama ba'ecue eshahuaa napa cajje miya  
ejjadasia meequijji pojjeama!

15 Jiquio ecua ejiojji shejee, sapato,  
sohuinanohua huosho cani acuishajo mete'ama  
epojji jayojja jama ¡Eyacuiñajjija esohui ba  
neineicue mete'ama esohui huohuijji!

16 ¡Eyacuiñajjija esohui jayojja jama atiitiicue  
pea'ai! Jiquio ecua sohuinanohua copocopo baa  
emejo huosho cani ejjaqueyaquijji, iña cani ej-  
jaquecuaquijji, emeje edahua huo'ohuo'o icui  
nequiñajji jayojja jama ¡Eyacuiñajjija esohui jayojja  
jama atiitiicue Edosiquianaja miya edasiajji poj-  
jeama!

17 Cuanaya jiquio ecua sohuinanohua ejaahuo-  
jja ca'a, baajee sapa iya cani jama onaja sapa jaja  
jjima yajji jayojja jama ¡esohui esapajo huanacue  
miquianaya quea tai ejjashahuabaqui meeji po-  
jjeama eshahuaaja, Jesusaja epeeji nei poanijo!  
Jamaya pea'ai jiquio ecua sohuinanohua baa se  
beca iña cani pea jajajeabichajeajji jama jayojjaya  
¡Eyacuiñajjija esohui mimicue eshahua mimicua-  
jeanobiajeajji, Edojjoshahua Pameya ameesahua  
canijo!

18 Jamajjeya ¡Eyacuiñajji nijje mimicue jama ba'a:  
—Eyacuiñajji, ¡eya miquea epeeji quea ca'a nee  
mo po meecue eshahua cuana, eshahuaaja epee-  
jji cuana pea'ai mimicuaJeanobiajeajji! ¡Edo-  
jjoshahua Pame huojeacue minijje emimi tiitii  
meesahuajji! —jamaya oe acue!

Jamajjeya ¡jjashahuaba neineiicue quea ja'a  
nee! ¡A'a Jesosa nijje jjapeequi pajea'yojji!

¡Ojjaña Jesusaja epeeji cuanajo mimi huicha'ahuicha'acue jama ba'a: —Eyacuiñajji, ¡ojjaña Jesusaja epeeji cuana jaahuanacue! ¡Quea ja'a nee po meecue! —jamaya acue!

<sup>19</sup> Jamajjeya Eyacuiñajji nijje mimicue ejo jama ba'a: —Eyacuiñajji, Pabo miquea esohui huohui canijo ¡huohui meesahuacue mete'ama! Oya huohui meesahuacue, Eyacuiñajji, jama ba'a: “Jesusaa Jodio pojjeama cuana ojaya epeeji po mee cani onijje eba'e tiitii'yojji eyajo. Maya yahuajo onajaya ba jjima” —jamaya mimicue Eyacuiñajji nijje ejo.

<sup>20</sup> E'e, Eyacuiñajjiya eya huoojea canaje Jesusaja esohui huohuiya. Ma esohui quea pame nee huohuiañajo, dejja quea mase cuaa eya iña majje jeanobiajea canaje. Jamajjeya ¡Eyacuiñajji nijje mimicue ejo esohui quea pame nee Jesusajo mete'ama ehuohui meesahuajji!

*Pabo mimiani Eyacuiñajji nijje ojjaña Epesojo ba'e jaahuanajji*

<sup>21</sup> ¡Pea esohui bacue! Dejja bajjani Tiquico yani ecuanaja nijje. Oya ecuanaja quea jea nee nee, ecuea epeeji nei nei. Ohuaya ecuanaja Jesusaja esohui huohui sahua cani. Miquiana huasijje poqui majje ohuaya huohui caje ejo, ma eya aña jayojjaya huohui caje'yo pea'ai.

<sup>22</sup> E'e, eyaya oya huoojeaña miquiana huasijje ecuanajo huohuiya. Oya shajja'ajja majje miquianaya yeno'ama poaje ecuanajo.

<sup>23</sup> Eya quea huiso mimiani Eyacuiñajji nijje miquianajo jama ba'a: —Eyacuiñajji, miya ecuanaja Chii ai. Jesosa Quito, miya ecuanaja Emeshi

Mese nei. ¡Ojjaña miquea epeeji cuana Epe-sojo ba'e quea bei nee po meecue! ¡Oya cuana ojjaña miquea epeeji cuana quea jea nee po meesahuacue! ¡Oya cuana miquea esohui jayojja jama ba'e meesahuacue quea ja'a nee pea'ai! — jamaya eya poani.

<sup>24</sup> Jamajjeya esejaya Emeshi Mese nei Jesosa Quito quea jea tii tii poanijo, ¡Eyacuiñajjiya miqianaya caba'e meesahua cahua!

Mahuiso ecuea esohui. Eyaya Pabo bajjaniya esohui tehuejeyonaje. Apoa.



## **Eyacuiñajjija Esohui** **New Testament in Ese Ejja (BL:ese:Ese Ejja)**

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

### **Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Ese Ejja

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

---

PDF generated using Haiola and XeLaTeX on 18 Apr 2025 from source files  
dated 29 Jan 2022

88838088-e20d-51ca-8c91-69194f5ae678